



## Aurrekariak

Alkarbidek euskal gizarteari egiten dion proposamenaren ezaugarri nagusiak aurkeztu nahi ditugu, eta bide batez, azaroaren bukaera aldera egingo de Biltzarrarekin amaituko den erakunde politikoaren sorrera prozesuari hasiera eman nahi diogu.

Egia esan, ez gera berriak euskal politikagintzan. Alkarbideren sustatzaileok, kultura politiko bera dugu esperientzia politiko luzea partekatu izanaren ondorioz, eta horrek, euskal politikagintzan azaleratzen diren arazo berrien aurrean ikuspegi eta jokabide berdina izatera eramaten gaitu. Gure ikuspegia eta jokabidea ezagunak dira gure herrian eztabaida publikoa jarraitzen dutenentzat eta aurrera atera nahi dugun proiektuaren oinarrian egongo dira.

Horrela, abertzaletasun historikoaren eremuan kokatzen gera, baina era berean, ikuspegi kritikoaz baliatuz, beharrezkoa ikusten dugu mezu eta jokamolde berriak lantzerantz irekiak egotea, premia berriei erantzuteko. Oinarrian betiko abertzaletasunaren jarraitzaile, baina gero eta euskal herritar gehiagok nazio ideiarekin bat egitea erdietsiko duen diskurtsoa egiteko erreferente baliagarriak bilatuko dituen. Horregatik, hauek izan dira gure azken urteotako diskurtso politikoaren ezaugarriak:

- gure erakundearen garapenaren aldeko apustua, mailaz mailako nazioa eraikuntza proiektua lehenetsiz, fronte eta abenturetatik urrun,
- gizabanakoa helburu izango duen proiektu sozial iraunkor eta eraldatzailea nazio ikuspegiarekin bat egiteko interesa,
- terrorismoaren gaitzespena eta euskal gizartearen gain eragin nahi duen bortzazko tutoretzari aurkakotasuna, eta azkenik, alderdiaren ikusmolde demokratikoa gizarte demokratikoago bat eraikitzearen zerbitzura.

## Alkarbideren proiektua

**Alderdi abertzalea eta berritzailea.** Orain arte aipatutakoak gogoan hartuz, gizarteak Alkarbideren ezaugarri nagusiak ezagutu nahi ditu. Ezaugarri horiek, erakunde politiko berriak gaur abian jartzen duen eta udazkenaren bukaera arte iraungo duen eztabaidan garatuko ditu.

Alkarbide alderdi abertzalea da, abertzaletasun historikoaren oinordekoa. Alkarbidek bere egiten du mugimendu politiko honen esperientzia instituzional oparoa, izan ere, bere lidergoan idatzi baitira, Agirre lehendakariaren errepublikar garaitik gaur egun arte, euskal gizartearen historia modernoaren orri emankorrenak. Alkarbidek, erreferentzia horiekin koherentziaz, Euskal Herria, euskal komunitate nazionala, European beste herriei berdintasunean ordezkaturik egotea du helburu eta gure herriari bere borondatearen kontra inork ezingo diola inolako proiektu politiko eta sozialik inposatu aldarrikatzen du.

Alkarbidek nazio ideia gizabanakoaren zerbitzura dagoela aldarrikatzen du eta pentsamolde hori gizarteratu nahi du. Pertsona libreak aberri libre batean. "Erabateko nazioaren" ideian sinesten dugu, izaera hedakorra duen eta horizontalki zabaldu nahi duen nazioan. Guretzat, nazio eraikuntza prozesu historikoa da, egunez egun belaunaldi berrien ekarpenekin gradualki garatzen dena. Horregatik, gero eta euskal herritar gehiago ideia horrekin integratuak eta identifikatuak egotea bilatuko dugu. Nazioa eraikitzea ez da abertzale kontzienteen ekintza bakarrik, jarrera oldarkorrak baztertuz gizartearen gehiengoaren babesarekin bakarrik lortu ahal izango da.

Alkarbidek argi ikusten du nazio ideia hau sustatzeak egunez egun aldatzen ari den gizarte batean jarduteko gai den abertzaletasuna garatzea eskatzen duela, aldatzeko eta akordioak lortzeko gai dena, lagunak egiten dakiena eta gizarte mobilizatzeko gai dena.



Alkarbide beraz, gizartearen babes geroz eta handiagoa bilatzen duten estrategien aldekoa da. Horregatik, bere jarduera politikoa errealista eta gradualista izango da. Horrek, gizartearen beharrak eta lehentasunak aztertzea eta gizarteak guregandik espero duen zerbitzua emateko modu egokienak etengabe neurtzea behartuko gaitu.

Alkarbide, testuinguru honetan, elkarlan estrategikoaren aldekoa da, abertzaletasun instituzionalak euskal gizartearen gehiengo zabala biltzeko moduko nazio eraikuntzaren lidergoa berreskuratu dezan.

**Bultzada demokratiko berri bat.** Badakigu abertzaletasunaren jardura gizarte alorrean gutxitzen joan dela, eta horregatik, esparru horretan esku-hartze handiago baten beharri arreta berezia jartzeko konpromisoa hartzen dugu. Horrek, aurretiko zehaztapena eta egungo errealitate sozialen inguruko etengabeko hausnarketa egitea eskatuko du.

Horregatik, Alkarbidek sustraitik demokrata den alderdia izan nahi du, hiritarren eta erakundeen arteko identifikazioa areagotzearen aldeko etengabeko konpromisoa hartzen duena, herritarren parte-hartze bideetan sakonduz.

Alkarbidek beraz, ahuldura seinale nabarmenak dituen gure erakunde sistemari "bultzada demokratiko berri bat" eman nahi dio, Administrazio eta hiritarren arteko harreman arinago bat bilatuko duena, parte-hartze bideak zabalduz eta sistema barrutik aldatuz.

**Konpromiso soziala duen alderdia.** Arlo sozio-ekonomikoan sozialdemokrazia moderno baten aldeko apustua egiten dugu, aukera berdintasunaren printzipioan oinarrituz, baliabide publiko zein sozialak optimizatzeko erronkari aurre egingo diona. Horrela, benetako giza garapen inguru batean behar adinako ongizate estaldura gizarte osoari zabaldu ahal izateko.

Esparru honetan, Alkarbidek gizabanakoaz arduratuko den eta zuzentasuna, justizia soziala eta elkartasuna oinarri dituen kudeaketa eredu baten alde egiten du, izaera iraunkor, parte-hartzaile eta solidarioa duen eredu berri batera joango den sistema sozial eta ekonomikoaren mailakako eraldaketa bilatzen duena.

Eraldaketa sozial honek etorkizunik izatekotan egungo kultur eta baloreen krisiari aurre egiteko gai izan behar dugu, horrela, bere giza garapena aintzakotzat hartzen duen gizartearen oinarrian, lanaren, ekiteko gaitasunaren eta elkarrenganako elkartasun loturen garrantzia berreskuratuko dituen eredia ezariz.

**Alderdi irekia, demokratikoa eta modernoa.** Alkarbide modu garden eta demokratikoan antolatuko da. Proposatzen dugun gizarte ereduaren isla den alderdia eratu nahi dugu, parte-hartzearen kulturari ekarpena egingo diona. Gure ustez politikagintzak behar duen bultzada demokratikoa eta parte-hartzailea emateko alderdiek atea irekitzea beharrezkoa baita.

Horregatik, gure antolakuntza ereduak izaera ideologikoa izango du. Tokian tokiko autonomia babestuko duen eredia izango da, eztabaida librea sustatuko duena, militantzia eta atxikimendua ulertzeko modu berriei bide emango diona eta gizartearekiko hurbiltasuna eta gardentasuna bilatuko dituena. Azkenik, Alkarbide alderdi moderno eta berritzailea izango da, gaur egungo gizartean errotuta dauden komunikazio eta harreman modu berriak ezarriko dituena.

Donostian, 2009ko Ekainaren 26an